

Թեան հասած — բացառութիւն չկաղմելով այդ ընդհանուր օրէնքից, իր փրկութեան յոյսը դընուած է Արեւմուտքի, մասնաւորապէս նրա քրիստոնէական մարդասիրութեան վրայ:

Դրա մի պատճառն էլ այն է, որ հայ ժողովուրդը Արեւմուտքից նման մէկ օգնութիւն մի անգամ էլ տեսել էր իր անցեալում: Սաշա-կիր Եւրոպան նպաստեց Ռուբինեանների ոյժին եւ յարատեւութեանը մահմեդական ծովում: Հետեւապէս ի՞նչ զարմանք, եթէ այդպիսի մի դէպք նորից կրկնուէր:

Երրորդ պատճառը՝ որ Եւրոպան աշխարհին դեռ չէր ցոյց տուել իր իսկական հոգին — անմարդասէր, շահամոլ եւ շնական: Մանաւանդ Արեւելքում եւ այն էլ ճնշուած ժողովուրդների մէջ տակաւին ապրում էր պատրանքը Եւրոպայի չեղեալ մարդասիրութեան եւ բարոյական նկարագրի մասին:

Բայց ամենից զլիաւոր պատճառը կաթոլիկ միսիոնարների գործունէութիւնն էր Հայաստանում: Զուկը հեշտ է բռնում պղտոր ջրում: Մեր երկրի պայմաններն էլ այնպէս էին, որ մարդորսութիւնը կարող էր հեշտ երեւալ կաթոլիկ միսիոնարներին: Ուստի եւ նրանք վիստում էին մեզանում, մանաւանդ պարսից բաժնի Հայաստանում, դեռ 14-րդ դարի ըսկիզբներից սկսած: Դոմինիկեան, Օգոստինեան, Կարմէլեան, Կապուչինեան, Յիսուսեան (Եզուիտ) եւ այլ բազմաթիւ քարոզիչներ սկըսել էին մի զօրեղ պայքար Լուսաւորչական եկեղեցու դէմ՝ յանուն հայ ժողովրդի հոգու փրկութեան:

Չպէտք է նաեւ մոռանալ, որ կաթոլիկ միսիոնարները սոսկական քարոզիչներ չէին միայն, այլ դրա հետ միասին նաեւ այս կամ այն պետութեան պաշտօնական ներկայացուցիչը: Ծատերն էլ, եթէ այդ պաշտօնական հանգամանքը չունէին, բայց գոնէ ունէին յանձնարարական թղթեր այս կամ այն պետութիւնից եւ վայելում էին նրանց հովանաւորութիւնը: Այսպէս, Օգոստինեանները Փորտուգալիայի ներկայացուցիչն էին Պարսկաստանում, Կարմէլեանները՝ Պապի, Կապուչիններն ու Յիսուսեանները Պարսկաստանում հաստատուեցին Փրանսական կառավարութեան յանձնարարականով եւն.:

Եւ օգտուելով իրենց քաղաքական դիրքից ու առաւելութիւններից, կաթոլիկ միսիոնարները ամէն շարիք գործում էին հայ ժողովրդի գլխին՝ նրան Հռովմի փարախը տանելու համար:

Բայց պիտի խոստովանել, որ անհամար չարիքների հետ միասին, նրանք մի գեղեցիկ ծառայութիւն եւս մատուցին մեր ժողովրդին, մասնաւորապէս նրա անկախութեան դաղափարին:

Այդ այն է, որ նպատակ ունենալով ձուլել հայոց եկեղեցին հռովմէականի հետ, նրանք խոստանում էին ազատագրել հայերին մահմեդականների լծից, առաջին հերթին պարսից լըծից, եւ անկախութիւն շնորհել: Նրանք շարունակ այն միտքն էին քարոզում ու ներշնչում մեր ժողովրդին, որ եթէ ընդունեն կաթոլիկութիւնը կամ գոնէ Պապի գերիշխանութիւնը, Պապը նոր խաչակրութիւն կը հանի Եւրոպայից եւ հայերին կ'ազատի:

Այդ միտքը շատ զօրեղ կերպով քարոզում էին մանաւանդ Յիսուսեանները, որոնք միեւնոյն ժամանակ նաեւ Փրանսայի գործակալներն էին Արեւելքում, ուրեմն եւ Հայաստանում:

Այդպէս ուրեմն, օգտուելով մի կողմից՝ հայերի շատ ծանր կացութիւնից եւ միւս կողմից՝ տեղեակ լինելով Լուզովիկոս 14-րդի ծրարագրին, որ էր՝ Քուրքիայի նուաճումը եւ Արեւելքի ամբողջ քրիստոնէութեան ազատագրումը մահմեդական լծից, Յիսուսեանները եռանդով տարածում էին Եւրոպայի օգնութեան գաղափարը Հայաստանում:

Թէ ո՛րքան վառ էր հայերի ակնկալութիւնը Եւրոպայից, դա երեւում է Փրանսական մէկ հոգեւորականի վկայութիւնից, որ այդ օրերին դրում էր. «Ազատուելու տենչը հայերի մէջ շատ մեծ է. նրանք դեռ խորապէս հաւատում են Ներսէս Մեծի դուշակութեանը՝ որ քրիստոնեայ Արեւմուտքի միջոցով իրենք պիտի ազատուին մահմեդական լծից»:

Որ իսկապէս կաթոլիկ միսիոնարները, մասնաւորապէս Յիսուսեանները, Հայաստանի անկախութեան գաղափարի հրահրողը եւ հայ քաղաքական միտքը դէպի Արեւմուտք դարձրնողն են հանդիսանում — դրա համար բաւականաչափ ապացոյցներ կան մեր պատմութեան